

## კიდევ ერთი ნაბიჯი ჩემპიონობისკენ

ვოროშილოვგრადი. “ავანგარდის” სტადიონი. 14 ოქტომბერი.

“ზარია (ვოროშილოვგრადი) – “დინამო” (თბილისი) 1:2 (1:0).

“ზარია”: ტკაჩენკო, პინჩუკი, მალიგინი (ს. ჟურავლიოვი), იგნატენკო, ოლენევი, ი. ჟურავლიოვი, კუზნეცოვი, მალიშენკო (ივანოვი), კოლესნიკი, კუკსოვი, რაბოჩი.

“დინამო”: გოგია, კოსტავა, კანთელაძე, ჩივაძე, გ. მაჩაიძე, დარასელია, მ. მაჩაიძე, ქორიძე (ჩელებაძე), გუცაევი, ყიფიანი, შენგელია (სულაქველიძე).

მსაჯი: ს. ბელიაევი (მოსკოვი).

გაფრთხილებული არიან გუცაევი და იგნატენკო.

დუბლიორები – 1:2. თბილისელთაგან გოლები გაიტანეს მულაძემ და ბაზაზაშვილმა.

სსრ კავშირის 1978 წლის ჩემპიონატი ფეხბურთში დასასრულს უახლოვდება. ფინიშამდე დარჩა 4 ტური და ახლა გათამაშების ცხრილში შექმნილია ისეთი კონიუნქტურა, რომელიც უფლებას გვაძლევს თბილისის “დინამოს” ყოველი ახალი წარმატება, ყოველი ახალი ქულა განვიხილოთ, როგორც სერიოზული და საფუძვლიანი არგუმენტირებული განაცხადი ოქროს მედლების მოპოვებაზე. ამიტომაც, რომ ვოროშილოვგრადის “ავანგარდის” სტადიონზე მოპოვებულ გამარჯვებას ადგილობრივ “ზარიასთან” ვთვლით კიდევ ერთ ნაბიჯად ჩემპიონობისკენ. ქართულ ფეხბურთს რეალურ პერსპექტივაში აქვს ისეთივე დიდი, სასიხარულო ზეიმი, როგორც მან 1964 წელს იდღესასწაულა.

მაგრამ მოვლენებს ნუ გავუსწრებთ წინ და შემოვიფარგლოთ “ზარიასთან” ჩატარებული მატჩის პერიპეტივებით.

თბილისის “დინამოს” ახლანდელი სატურნირო მდგომარეობა ყველამ კარგად იცის და თითოეული ქულა მისთვის ოქროს ფასად ფასობს, მაგრამ არც “ზარია” განწყობილი ისე, რომ უბრძოლველად არიგოს ქულები და ისიც შინ, საკუთარი გულშემატკივრის თვალწინ. ამიტომ იყო, რომ მასპინძლებმა მონდომებული შეტევით დაიწყეს თამაში, მთელი ძალები წინა ხაზზე გადაისროლეს და რამდენიმე ძალზე სახიფათო მომენტიც შექმნეს. სახიფათო პოზიციაში იმყოფებოდნენ კუკსოვი, ოლენევი, რაბოჩი, მალიშენკო. დინამოელთა მცველებს და მეკარე გოგიას მძიმე სამუშაო დააწვიათ, კერძოდ, გოგიას ზედიზედ მოუხდა ძნელი ბურთების აღება.

22-ე წუთზე ვოროშილოვგრადელებმა გახსნეს ანგარიში. ერთ-ერთი იერიშისას მალიშენკომ შეძლო რთული მდგომარეობიდან გაეგზავნა ბურთი ბადეში – 1:0.

გაშვებული გოლის შემდეგ თბილისელები მნიშვნელოვნად გააქტიურდნენ, თამაშმა ჯერ შუა მინდორში გადაინაცვლა, შემდეგ – “ზარიას” ნახევარზე და ახლა უკვე მასპინძელთა მცველებს და მეკარე ტკაჩენკოს გაუჩნდათ სამუშაო. ბურთის გატანა შეეძლოთ ჯერ დარასელიას, შემდეგ მ. მაჩაიძეს და კოსტავას.

მაგრამ სრული ძალით “დინამო” ათამაშდა მეორე ტაიმში, როცა ვოროშილოვგრადელებს მხოლოდ ეპიზოდური კონტრშეტევების სულ რამდენიმე შესაძლებლობა ხვდათ წილად. დინამოელები უტევდნენ ხშირად, უტევდნენ სწრაფად, ენერგიულად.

როგორც კი განახლდა თამაში, მ. მაჩაიძემ ოსტატურად დაარტყა შორი მანძილიდან და ბურთი ზედა ძელს ქვეშ გავიდა კარში – 1:1.

ფრე თითქოს ურიგო შედეგი არ იყო გასვლითი მატჩისთვის, მაგრამ დინამოელები ინარჩუნებდნენ სათამაშო და ტერიტორიულ უპირატესობას, სახიფათო მომენტები კვლავინდებურად იქმნებოდა “ზარიას” კართან. 86-ე წუთზე იგნატენკომ ხელით ითამაშა თავის საჯარიმო მოედანზე, რისთვისაც ს. ბელიაევმა დანიშნა პენალტი. დარტყმა ზუსტად შეასრულა ყიფიანმა – 2:1.

აღსანიშნავია, რომ მატჩს ვოროშილოვგრადში ესწრებოდა უეფა-ს თასზე 18 ოქტომბერს თბილისის “დინამოს” მეტოქის – დასავლეთ ბერლინის “ჰერტას” მწვრთნელი კ. კლიოტცერი, ხოლო თბილისელთა უფროსი მწვრთნელი ნ. ახალკაცი იმყოფებოდა დასავლეთ გერმანიის ქალაქ მაინის ფანკფურტში, ბუნდესლიგის ჩემპიონატის კალენდარულ მატჩზე ადგილობრივ “აინტრაჰტსა” და “ჰერტას” შორის.

დაბოლოს, დუბლიორთა შეხვედრის შესახებ. “ზარიას” და თბილისის “დინამოს” სათადარიგო შემადგენლობათა მატჩში დაწინაურდნენ მასპინძლები (ლუკიანჩუკი), მაგრამ ბაზაზაშვილმა 11-მეტრიანი დარტყმით გაათანაბრა ანგარიში, ხოლო მუმლაძემ გადამწყვეტი გოლი გაიტანა ვოროშილოვგრადელთა კარში. თბილისის “დინამო” 38 ქულით ლიდერობს დუბლიორთა საკავშირო გათამაშებას.

ნ. პედეკო.

“ლელო”, 17 ოქტომბერი, 1978 წ.